

Kenyataan Yang Terdapat Dalam Menyambut Hari Raya

Apa Erti Hari Raya.

Hari raya dua perkataan yang tersusun dari “hari” ertinya peredaran masa, dan “raya” ertinya besar. Hari raya: ertinya peredaran masa yang mengandungi erti yang besar, atau hari yang dibesarkan. Yakni pada hari atau pada peredaran masa itu orang telah memakainya untuk memperlihatkan sesuatu yang besar ertinya dan penting dalam kehidupan manusia - melebihi pemakai-pemakainya dari masa yang dipakai sehari-hari.

Perlukah Manusia Berhari Raya.

Sesungguhnya pada kejadian manusia itu banyak terdapat watak yang semula jadi, di antaranya; suka kepada perkumpulan, ingin mengadakan perjumpaan dan pertemuan, gemar mencari pergaulan, suka hidup beramai-ramai dan bersuka ria- jarang yang mahu hidup bersendirian, terpisah, terpulau, tersisih dan terasing dari masyarakat ramai.

Melihat akan adanya watak ini, dengan sendirinya hari raya itu adalah merupakan salah satu keperluan hidup bagi manusia, kerana dengannya adanya mereka akan dapat membaharui kasih sayang antara satu dengan yang lain dan menguatkan tali perhubungan sesama mereka di samping dapat pula mengecap rasa keseronokan dan menikmati udara kegembiraan yang mereka cari.

Mengapa Orang Berhari Raya.

Selama manusia mempunyai corak hidup yang bermacam-macam, selama itu pula mereka merasakan tekanan-tekanannya dan setiap mereka yang disinggahi tekanan-tekanan hidup yang silih berganti, tentu mengharap-harapkan untuk membebaskan diri daripadanya di satu masa, walaupun hanya untuk seketika.

Tak adalah suatu peredaran masa yang lebih besar ertinya dan tepat ketikanya dari hari raya kerana dianggap dapat melupakan segala kepenatan dan kerunsingan yang diperolehi sepanjang menjalani tugas hidupnya. Bila benar

anggapan ini, terjelmalah hari raya itu dalam bentuk yang mempunyai hakikat yang sebenarnya, sehingga perlu setiap masyarakat yang mendukungnya untuk mengabdikannya dan ditetapkannya supaya beredar setahun sekali menyinggahi mereka.

Bilakah Orang Berhari Raya.

Manusia hidup bermasyarakat, maka masyarakat itu perlulah yang menentukan saat dan ketikanya bila hari raya itu mesti diadakan. Tak ada ertinya hari raya bila diadakan tidak menepati sesuatu peristiwa yang besar dan bersejarah yang selaras dengan bentuk masyarakat tersebut dan keperibadiannya. Masyarakat dapat merupakan orang perseorangan, ada hari kelahirannya yang dirayakannya, ada hari meningkat ke jinjang rumah tangga, memulakan pembinaan kedaulatan rumah tangganya bebas dari kongkongan dan pengaruh orang lain, dan lain-lain sempena yang dianggap penting dalam sejarah hidupnya. Demikianlah pula dalam masyarakat.

Bukanlah hanya bila terus hendak bersuka ria, terasa hendak mengemukakan apa yang menjadi idaman hati lalu diadakan berjenis-jenis hari raya, yang akibatnya dapat melunturkan corak hari raya yang sebenarnya dan tidak akan terasa lagi keaslian hari raya yang sebenarnya.

Siapakah Yang Berhak Berhari Raya.

Kalau kita katakan, hari raya itu tidak bererti jika dia disambut tidak menepati sesuatu peristiwa

yang besar dan bersejarah, maka orangnya yang berhak menyambutnya pula, ialah yang punya sejarah itu sendirinya yang mendokong sejarahnya dengan erti kata yang sebenarnya, orang yang benar-benar mempunyai tanggungjawab menghormati syairnya dan berjuang menegakkan kehormatannya. Orang-orang inilah yang berhak merayakannya, layak menyambutnya dan dapat merasakan kelazatan hari raya itu dengan perasaan lega dan puas dan dapat pula membaharu semangatnya untuk meneruskan tugasnya dan perjuangan hidupnya.

Ini tidaklah bermakna bahawa orang lain tak layak menyambutnya atau tak berhak merayakannya, tetapi apa yang mereka nikmati tidaklah sebanding dengan orang-orang yang benar-benar tahu diharga hari raya tersebut, kerana sambutan mereka hanya turutan-turutan sahaja, tak tahu hujung pangkalnya, yang mereka pentingkan ialah bersuka rianya, mengajar keindahan yang bersadur, mementingkan kulit daripada isi, sehingga bila ia ditanya apakah yang dapat dari menyambutnya, dia tidak tahu hendak menjawabnya, yang dia tahu orang berhari raya berhari -lah dia.

Jenis Hari Raya.

Pada hakikatnya hari raya yang mempunyai erti hanyalah dua macam. Pertama yang bersifat kebangsaan, dan kedua yang bersifat keagamaan - sekalipun tiap-tiap sesuatu temasya yang dirayakan oleh manusia itu boleh dianggap sebagai hari raya.

Adapun hari raya yang bersifat kebangsaan itu, mulanya diciptakan oleh bangsa itu sendiri, berdasar kebangkitan bangsa itu pula dan mengikut sempena-sempena yang membawa kepada keagungan- sama ada terlepas dari terajah, dari tindasan atau penghambaan, mahupun kerana mencapai sesuatu kemenangan atau penaklukan terhadap bangsa asing- iaitu dua macam peralihan masa yang silih berganti yang ditimpa oleh setiap bangsa di dunia yang ingin hidup berkembang. Kerana adanya sempena-sempena yang demikian itulah makanya mereka menganggap perlu mengadakan suatu hari yang patut dirayakannya, secara kebangsaan.



Kegirangan terbayang di wajah penuntut-penuntut Iraq yang sedang berada di Mesir sebaik-baik sahaja mereka dengar tergulingnya kerajaan Kassim yang kejam dan membaca beritanya dalam akhbar keluaran petang.

Hari Raya Keagamaan.

Setiap pemeluk agama di dunia ini mempunyai hari rayanya sendiri, iaitu hari yang dianggap suci lagi mulia mengikut kepercayaan si pengikut agama tersebut, hari yang akan dipenuhi dengan upacara-upacara ibadat, doa dan sembahyang, gerakan-gerakan kebajikan, amal dan bakti, serta anjuran-anjuran yang mengenai tatasusila dan budi pekerti yang baik, kerana semua agama menganjurkan kebaikan dan mengeji kejahatan - baik yang merupakan agama ciptaan Ilahi, mahupun agama ciptaan insani.

Hari Raya Islam.

Kita umat Islam mempunyai dua hari raya agama yang telah diterangkan oleh junjungan kita Nabi Muhammad (S.A.W) mengenai erti kedua hari raya tersebut- sebagaimana yang diriwayatkan oleh Anas bin Malik (r.a) katanya:

Setelah Rasulullah (S.A.W) sampai ke Madinah, dan mendapati penduduk-penduduknya mempunyai dua hari raya yang dipenuhkan dengan bermain-main (mengadakan beraneka permainan) warisan dari zaman jahiliah, maka Rasulullah (S.A.W)

pun bersabda; “*Inna Allah tabāraka wa ta 'āla qad abdalakum bihimā khayr minhuma: yawma al-fitrī, wa yawma al-nahār*” ertinya¹:

“Sesungguhnya Allah yang Maha Suci dan Tinggi telah menggantikan bagi kamu dua hari raya yang terlebih baik lagi dari keduanya, iaitu Hari Raya Fitrah dan Hari Raya Korban.”

Jelaslah dari apa yang diterangkan oleh hadith ini, bahawa Nabi (S.A.W) tidak menetapkan suatu hari raya yang tertentu kepada umatnya, melainkan setelah baginda berhijrah kemudian setelah menunaikan dua macam kebaktian terhadap Allah yang berupa ibadat puasa dan ibadat haji.

Umatnya telah diwajibkannya puasa terlebih dahulu baharulah diakhiri dengan berfitrah, sehingga menjadilah ia suatu hari raya. Dan diwajibkannya pula haji dengan menyempurnakan dengan penyembelihan korban, sehingga menjadilah ia suatu hari raya yang lain pula. Maka dengan secara tidak langsung dua hari raya yang mereka warisi di zaman jahiliah itu telah menjadi dua hari raya keagamaan yang bersih dari anasir-anasir jahiliah yang biasanya dipenuhi dengan perkara-perkara maksiat dan dosa.

Itulah dua Hari Raya Puasa dan Haji, dua hari raya Islam yang suci yang telah lebih 1300 tahun disambut oleh umat Islam sebagai suatu tradisi.

Kedua-dua hari raya itu tidak disambut dengan meriahnya, tidak dirayakan dengan penuh megah dan kesyukuran melainkan setelah melalui perjuangan yang hebat, iaitu perjuangan perut dan batin, perjuangan nafsu dan tingkah laku, yang diuji selama sebulan, waktu menjalani puasa Ramadan. Setelah berjaya dalam perjuangan tersebut dan lulus menjalani ujian, baharulah terasa

nikmatnya berhari raya- kerana disambut bukan sebagai pak turut. Kemerahan hari raya itu bukan pada sambutan makan minum dan pakaian, bukan pada perhiasan rumah tangga yang serba baharu, tetapi pada kejayaan berjuang, pada keteguhannya beriman, bersih lahir dan batinnya.

Bersih rohani dan jasmaninya.

Setelah menempuh kejayaan dalam merayakan Hari Raya Puasa, datang pula saat dan ketikanya menempuh masa pengorbanan, iaitu mengorbankan harta yang tidak sedikit mengorbankan masa dan waktu di samping mengorbankan pula tenaga yang tidak berharga. Itulah masanya ketika menunaikan ibadat haji, ibadat yang diserukan oleh tuhan dengan firman-Nya; “*al hajju ashhurun ma 'lumātun faman farāda fī hinna al-hajja fala rafatha walā fusuqa walā jidā la fi al-hajji, wamā taf'alu min khayrin ya 'lamhu Allāhu, wa tazawwadū fa'inna khayra al-zādi al-taqwā wattaquni yā 'ūli al-albābi*” (al-Baqarah 197), ertinya; “Mengerjakan haji itu pada beberapa bulan yang tertentu, barang siapa yang mengerjakan fardu haji tiada dibenarkan berseluruh, tiada boleh berbuat maksiat, dan tiada boleh pula bertengkar-tengkar pada waktu haji. Apa jua pun kebijakan yang kamu buat, nescaya Allah mengetahuinya. Berbekallah kamu! Sesungguhnya sebaik-baik perbekalan ialah takwa. Takutilah (azab-Ku) hai orang-orang yang berakal.”

Dalam ayat ini jelas pengorbanan besar yang mesti ditempuh oleh orang-orang yang menunaikan ibadat haji. Ibadat yang merupakan pelayaran, menziarahi Baitullah, memakai pakaian ihram yang mengingatkan perasaan darjah manusia dan mengingatkan ke mana dirinya nanti akhir kesudahannya, kerana dibalut kain putih yang seolah-olahnya hanya menunggu saat dan ketikanya diusung ke kubur. Adakah pengorbanan yang lebih besar dari itu? Iaitu pengorbanan yang disusul dengan penyembelihan korban, mencurahkan darah yang merah menyala dan membahagi-bahagikan dagingnya kepada fakir dan miskin. Itulah perayaan yang dimuliakan dan dibesarkan oleh segenap

¹ Hadith yang diriwayatkan Abu Dawud dan an-Nasa'i, Rasulullah SAW bersabda, “Sesungguhnya Allah mengganti kedua hari raya itu dengan hari raya yang lebih baik, yakni Idul Fitri dan Idul Adha.”

umat Islam- bukan terkhas kepada mereka yang sedang

menunaikan ibadat haji, tetapi umum kepada seluruh umat

Islam seluruh dunia, hendaklah disambut dengan pengorbanan

rohani dan jasmani; pengorbanan harta dan kekayaan,

pengorbanan masa dan waktu, pengorbanan tenaga dan fikiran,

dikorbankan demi untuk kebesaran hari raya, korban

mengikut kedudukannya yang sebenarnya.

Sesalan.

Tetapi apa yang menjadi kenyataan dalam menyambut

hari raya Islam itu, baik yang merupakan Hari

Raya Puasa atau Haji, telah dinodai oleh sebahagian

masyarakat umat Islam sendiri. Perayaan itu bukannya

disambut mengikut taraf atau kelayakannya, tidak pula

dirayakan mengikut batas-batas suruhan dan larangannya,

memelihara kesucian syiar dan kesucian kehormatannya, malah dinodai

dengan sambutan-sambutan yang mengandungi maksiat dan dosa

menumpang dan membonceng. Hari raya yang mulia itu

secara paksa, sehingga hari raya keagamaan itu

dijadikan matlamat pencerobohan yang bertubi-tubi.

Di sana sini orang-orang Islam mengadakan majlis

tari-menari kerana menyambut hari raya, majlis

beronggeng kerana menyambut hari raya, peraduan cantik

kerana menyambut hari raya, pertunjukan model kerana

menyambut hari raya dan seribu satu macam maksiat

diadakan kerana menyambut hari raya. Tidakkah terasa oleh

mereka bahawa hari yang mulia itu telah mereka perkosa,

diceroboh dan dinodai yang akan merekajadikan pula

suatu tradisi? Semoga Allah membukakan hati mereka

untuk menerima segala kebenaran, setelah sesat di hujung

jalan kembalilah hendaknya ke pangkal jalan - *Allahu akbar*

wa liLlāhi al-hamد.



“Jasru Shuhada” sebatang jambatan yang menghubungkan kedua tebing Sungai Dajlah.